

# Concierto mahestuoso di Steelband

ORANJESTAD(AAN)—

"Bin cu e concierto aki tur siman", "mester tin mas di e conciertonan aki na San Nicolas", "haci un gira rond di Aruba cu e concierto aki", "ki anochi tan agradable y dushi esaki ta", "mi nunca a diverti na San Nicolas manera mi a diverti e anochi aki cu mi casa y dos yiunan", "this is fantastic", "you made my visit on Aruba", "this thing is fabulous", ta entre otro poco di e comentarionan cu tabata tin, di hendenan local y di turistanan, diasabra anochi na San Nicolas durante e concierto di steelband riba lugar di staciona auto di Arubus cu a resulta magnifico pa actividadnan cultural.

**San Nicolas business Association** a auspicia e anochi, y **Juby Naar** a percura pa e organizacion y coordinacion, cual prueba di prome concierto na **Terminal di Bus di Arubus**, a resulta den un exito grandi.

Henter e espacio tabata yena cu hende y riba acera for di ariba te abao, tabata tin hendenan cu a bini cu nan stoel, otronan a keda para pa sigui e concierto te 1 or di madrugada.

Un total di 8 di e 10 steelbandnan a participa, ya cu e programa a perde hopi tempo cu cambio di banda, debi na aspectonan tecnico, y cu a muestra cu pa otro biaha master por tin dos escenario, di manera cu ora un ta tocando e otro ta preparando riba otro escenario.

**Family and Friends Pan Lovers** no tabata presente, y **The Failures Steelband** no a presenta ya cu debi na e ora laat cu nan mester a actua, 3 tocador clave mester a bay, pa motibo di trabao mainta trempa.

Mester menciona sin embargo cu hopi hende a bin pa mira **The Failures**, cu a bin prepara cu un repertorio special di sorpresa, y cu den e siguiente actividad sigur lo ta programa mas trempa.

**NGS, The New Generation** di Eric "Ricky" Figaroa a sorprende e



publico cu nan apertura di e concierto. Hobennan cu talento y cu ta vislumbra caba como e futuro grandinan riba steelpan. Hobennan cu repertorio completo pa actividadnan festivo caba y cu diasabra a impone nan number.

**"Touch of Steel"** cu a sigui a duna e publico lo inespera y tabata e grupo di mas grandi cu 17 tocador. **"El condor pasa"** cu nan a interpreta a cosecha enorme aplauso, pa e calidad y nivel halto cu nan a presenta cu e clasico aki.

**Bito and the Boys cu Robby Philips** riba "pan", a gara e publico for di nan prome cancion y varia ritmo tras di ritmo, y nan potpourri mexicano tabata tin publico aplaudiendo cu cada quebrada pa e toca formidable di Philips.

**North Stars** cu nan grupo di "stage" tambe a demostra cu no ta riba caya so por goza di nan cu roadmarch, pero riba escenario tambe nan ta maestro. **North Stars** su popularidad a crece sigur e anochi aki pa e calidad



musical cu nan a demostra nan publico, y cu un repertorio crioyo y varia cu a impone.

Un cu sigur a **"steal the show"** tabata **Nico Connor**. E repertorio di musica popular, cu temanan grandi y su maestria y lihieza di mannan, y talento di lora



tononan a cosecha aplauso tras di aplauso, y si no tabata pa limite di cantidad di cancion, e publico lo kier a sigui scuche hopi mas.

**"Magic Steel"** tambe a pone su publico den su man cu nan cancionnan despues di a warda hopi for di 8 or pa nan oportunidad. **Magic Steel** tambe a demostra mescos cu tur otro cu pa cualquier actividad, nan lo ta entre e grandinan pa animacion musical y varia manera desea.

**"Tradition Steel"** e steelband di Bon Bini Festival tambe a bin cu un repertorio varia pero cu mas cancionnan tipico o crioyo. Hopi exito e grupo aki a cosecha cu su

presentacion y na final e ovacion no a keda afo tampoco pa nan.

E anochi a cera cu **Francis Jacobs and Friends** cu a duna e anochi un final festivo cu su animacion di publico, y e precioso cu nan a interpreta wals y joropo venezolano, variando e ritmonan internacional di e anochi mas ainda inclui den esaki un combinacion di tumba basa riba **"Dalia"**.

**John Francis**, yiu di **Francis**, a hinca a publico den un "trance" cu interpretacion di un di e exitonan grandi di e pianista Kleiderman, combinando su "pan" cu e piano formidablemente foca pa **Jonathan "Biggy Boy" Thiel**. **John Francis** a bin resulta e sorpresa grandi di anochi.

No por keda sin duna elogio pa e manera fantastico cu **Ronald "Baba Charlie" Manuela** a presenta e anochi aki, manteniendo e publico



bon anima y cu interaccionnan na nan lugar na momento cu tabata tin mester.

E exito aki a bin resulta grandemente pa e colaboracion cu **San Nicolas Business Association** a haya spontaneamente di empresanan di San Nicolas cu a percura pa San Nicolas por tabata tin un actividad festivo.

**Karel Wever di WEMA**, **Boogaard Assurantien**, **Victoria Bottling Company** y **Valero** cu a contribui pa cubri gastonan envolvi; **TEC** cu **Polar**, **Eddy Tec** cu su equiponan di sonido, **Angel Coronel** cu a percura a luz pa e bandanan musical y cu a haci filmacion di e anochi, **Ted Hasham Joseph** y nan grupo cu a presenta cu generador pa por a tin coriente na e lugar for di 7 or anochi, **Ministerio di Cultura** cu a pone e stoelnan disponibel e anochi aki pa e publico por a sinta tranquil y sigui e presentacionnan y naturalmente tur e agrupacionnan musical cu a toca y esnan cu no a haya oportunidad y cu gratuitamente a duna e show aki, y finalmente **Arubus** cu mes ora cu apelacion a ser haci pa usa e lugar a habri man pa esaki.



Grandi tabata e colaboracion di **Cuerpo Policial di San Nicolas** y di **Visibility Team** cu patruyahe y permitiend e ora extra pa e anochi.

**Sr. Ronald Peterson** di **an Nicolas Business Association** no tabata tin palabra pa gradici tur e hendenan cu a colabora y contribui pa duna **San Nicolas** un **Celebracon** grandi pa **Himno y Bandera**.